

人物志八

天下之大惟人物贊之即操術不一必有振其  
墟里者焉語云水圓折產珠水方折產玉自然  
之符也况邵居八閩上游萬峯如繡閣闢烟雲  
乘其氣而植豐飲其和而生聚若夫妬其靈而  
名賢卓起當不乏耳且此數十年中大匡斯始  
湏才更殷必有若而人起而責之即如清門吉  
德蘭佩嘉修以及霜礪之幽期深閨之淑秀原  
始而要終允無可訾則塵下之珍亦青史所不  
棄矣乃奮而有所立豈可湮而罔所傳續人物  
志

理學 名臣

忠義

李翔字颺舉邵武縣亨泰坊人幼失怙事母以孝聞  
母病翔焚香於掌祈天七晝夜至誠感神母疾隨愈  
少儻以詩酒自豪補郡弟子員中崇禎己卯鄉試





副榜拔貢次年北上廷試適邊警求言翔忼慨上書  
語侵權責幾不測賴一二巨公力護免翔名由是重  
於時甲申闖寇犯燕聞變瀝血草檄誓殉國難迨唐  
藩入閩翔時任江西新城縣令先時舊令譚夢開籍  
獻款名多括民財衆共攻殺之閱月亂未定比翔至  
即日捕渠魁黃東來斬之餘黨乃解未幾邑三都民  
因爭斗不平揭竿起鼓譟數千人肆掠城市翔諭之  
勿止乃密遣義兵三百人出城裹紅巾從南門入稱

邵武府續志

人物

卷八

二

官兵且至亂民少却詰朝復鼓而進翔親率兵壯敗  
之誅首亂數人仍爲較定斗式始安是時盱江以北  
已悉歸 大清版圖王師畧地漸逼新城翔與同事  
盟神歛血矢以死守及勢日蹙或有引兵潛遁者翔  
嘆曰男兒死耳國恩未報奚遁爲志愈奮躬擐介冑  
先士卒日夜不遑息城陷猶赴戰手刃三人度事去  
因大呼曰我新城令也何不殺我遂被執見渠帥直  
立不跪罵不絕聲帥恚甚責四十棍血濺肉飛然猶



憐其忠誠往南昌繫於獄餌之降勿應予酒食勿食  
啣指血題詩獄壁有取義成仁死不難句遂觸柱氣  
絕帥命昇出斬之事聞贈太僕寺少卿謚忠壯○論  
曰李翔當勝國之季以彈丸孤城抗百萬王師殆不  
知天命矣哉及讀討逆闖一檄知翔恥為馮道久矣  
一死寧復悔耶末俗貞烈氣衰翔無文山之任而效  
文山之忠庶幾明致身之義者昔孤竹二子尚父稱  
之義士闕黼殉元明祖為之立祠由此言之翔亦足  
郡武府續志人物 卷八 三  
以傳矣

明元體中字孩若邑東朱坊墟人元昭武路總管水  
鏡將軍之裔也少為郡諸生工制藝募韜鈴能馬上  
運雙戟左右刺無不中者際崇禎末年國步多艱遂  
南遊吳越間為董大司築城於海澳擊破海寇數十  
艘由是薦紳交稱之中丞蕭公試以後營守備庚辰  
分汛杉關因勢據險戰守之具畧備七臺荏苒竊發  
中率精銳數百討平之光澤李東球倡亂集黨數千



號百花英又有賽花英者衆亦數千互相攻擊行將  
揭竿起中統五百人駐止馬扼其吭而絕其援東球  
就擒癸未流氛入袁吉二州江右騷然閩西風鶴巡  
撫張公肯堂行視杉關見中所創磊木石棚數十處  
問其費曰以金八百問所出曰皆中鬻產物也張亟  
題薦有雄當虎豹學本孫吳等語會二京相繼失守  
豫章諸地悉入清圖唐藩即位於福州擢中總兵  
屬以恢復之任中所部精卒別赴調去臨期招募僅  
得三千人督師蔡檄催出師中請寬期簡練弗許乃  
統新卒二千啣枚夜走四十里始達洵口值清兵  
有備伏起中陷入陳勇氣百倍刺殺數十人斬一騎  
將圍愈合四面大呼曰元將軍可降矣中瞑目持槊  
疾聲叱曰有斷頭將軍無降將軍也竟力戰而歿

風節

清修

明吳嘉泰字通寶東廂進賢坊人處厚之裔登萬曆



丙午鄉薦考授知州值父年七十泰甘清貧矢志奉  
養不就仕處昆季昆善即一錢一粒悉均享焉年四  
十卒時兩孀一孤贍無十畝居無立錫合郡惜之

張能恭字禮言東隅迎春坊人博學有大志自少以  
孝友稱及長分析凡祖父所傳屋產悉讓之親叔惟  
自築居授徒以奉母其胞弟之日用咸取給焉領餼  
後館於光邑歲暮方束裝歸適貧人黃汝蒞為債主  
所窘欲投河其鄰趙士顯來告恭立解館穀十金代

邵武府續志

人物

卷八

五

還而不命償蒞生得全又祖父遺穀百石歷貸於十  
六都之高坊等鄉鄉多貧者每累逋不能償恭心憫  
之槩焚其券其周急樂施如此崇禎庚午登鄉試第  
一有同年黃熙義暴卒於寓乃捐宴金拾兩助殯復  
代措七十金為賻同榜無不高其義云丙子歲飢恭  
力陳預備之策考前賢成議著義倉五規隨出貲買  
穀叁拾石為紳士倡民賴以賑先後公車凡六次兩  
院會薦題授知州職銜時以母病辭不赴選日杜門



著書廉介自守 清順治五年舉孝子次年會試歸  
旋卒年四十有七所纂述已刻有李忠定奏議選十  
卷禹貢訂傳一卷未刻有春秋五傳合選天地大文  
二集八十卷梁谿全集選十二卷藏於家

黃應蛟字士騰西關熙春坊人郡廩生性狷潔操行  
廉謹生平未嘗有所干謁家貧以舘餼自給泊如也  
事繼母孝溫清定省無缺於熙春山舍集徒講授多  
所造就應崇禎末年歲貢以未仕終其身

邵武府續志

人物

卷八

六

高崇禮字君厚邑之桃川人性嚴峻不苟言笑幼從  
其兄崇穀受業終身父師事之家貧以舘穀養親師  
表甚嚴其門下多知名之士事父母至孝侍祖母陳  
氏病扶抱寢興三年如一日值鼎革遂避山谷以自  
樂其志

仕蹟

高崇穀字柳營邑東水口寨人至性孝友勤於讀誦  
登萬曆壬子科鄉試第一初署歸安清河二學教諭



事漸中名流多就學奇字其所賞識如夏君曰瑚董  
率以魏科顯崇禎初累官至戶部山西清吏司主事  
奉命祭諸陵寢及齎牛犒邊俱稱旨朝廷嘉之尋督  
餉宣府蕙理屯田馬政凡兵餉運到朝收夕發胥吏  
無所容其奸或輓輸不前輒設法先給軍士以故成  
卒無譁廛市不擾會中貴人用事使如穀求鐵千斤  
穀心知爲金也竟弗與因得罪解組歸宣府兵民扳  
轅祖道者莫不泣下及歸里益端介自持凡調恤隣

邵武府續志

人物

卷八

七

族輒厚與之而不問其償常遇異僧授以守中之術  
年逾耄矍鑠如壯時晚舉一子人以為陰隲之報

云

陳之羨字綱存邑東拿口人登萬曆丁酉賢書成已  
未進士初授戶部主事提督通倉釐剔有方糧蠹爲  
之一清代之日惟羸羨蝕五百萬莖稱是盡籍其數  
授代者歷遷員外郎中時魏瑞方熾或說之交驩銓  
曹可致羨正容却之出爲浙江寧波太守會海寇犯  
境羨指授方畧悉討平之祝融爲虐將及黃堂即反



風滅火人謂太守廉明所感將及瓜捐任內贖鍰益以俸入凡五百金分給六學置田以贍貧士衆爲鐫碑紀德并錄其善政壽諸剞劂名曰澤甬芳程遷觀察副使分守甌越補任饒南饒濱湖故多嘯聚兼以流寇震鄰繕城鑿池屹戰守之具潯陽上下無烽燧驚淮藩涵玉手書古社稷臣四字褒之事聞朝廷知其能擢天津糧儲未蒞任改調廣東叅政分守嶺南整飭紀綱一以廉法率下未幾請告歸里里中形勝

邵武府續志

人物

卷八

八

如奎耀閣有建李公堤有築皆捐貲倡始迄今拿川人文鵲起蓋其作興之力著有仕學窺斑傳世

米嘉穗字秀實叅議榮之再從侄也少負文譽事繼母以孝聞萬曆戊午舉於鄉崇禎辛未授山東鄆城令鄆介曹汶固大盜淵藪兼豪右肆甚蠹罔上爲虐徭重而不均夙稱難治穗歷任首立均役輪役二法訪巨豪李三善王如鑑寘諸典捕役宋顯榮羅織良民立杖斃之撤戍卒之擾民者設鄉兵以爲衛時有



巨盜宋尚營張九河閭振武者陽就撫陰剽掠如故  
穗畫策擒之單車詣賊穴收其黨悉入籍為氓會總  
兵劉澤清援萊敗衄道出鄆人情洶洶疑有異常事  
欲遂勦之穗曰不可請捐金犒師令引兵而東卒解  
萊圍大兵之後又值凶潦民有道殣穗悉發廩穀六  
千石沿鄉賑濟所全活七千餘人將報最以他事忤  
權貴調知德平縣隨遷南直隸南城正兵馬值有偽  
印之獄穗恐株連冠紳亟置要囚於法案遂寢丁母

邵武府續志

人物

卷八

九

憂歸籍築室遯園嘯咏自娛三十餘年非公事不謁  
郡縣間有利弊當事輒就之咨訪崇禎丙子歲游饑  
首糴米以哺貧民順治丁亥寇猝起公私無備慨出  
貳百金扈戰守之具丙申寇再警適硝黃告匱復助  
金五十以資採買郡東長虹橋燬則建議興復捐百  
金為倡其居鄉好義急公類如此所著有澹菴詩集  
與大賓一十五次壽七十七終

王洵字惟信東隅鳳石坊人為入曠達多識以邑學



生登萬曆庚子鄉薦已未授湖廣承天司李有寃獄滯二十年弗結者洵廉其實所活三十餘人他如積奸楊道南章時雨輩洵皆置之法民蠹以清卸人士各刻像祀焉會監軍自襄抵河凡糗芻輓給之勞洵皆親董其役以故兵不擾而民不驚司院嘉其能交章題薦天啓癸亥擢蘓州督捕丞未幾以緝私鑄觸權璫怒遂拂袖歸崇禎初魏璫旣除朝議復洵原職值洵年六十不果仕有吳楚浪吟詩集傳世

邵武府續志

人物

卷八

十

高佐字輔明在城東隅人佐天性純篤飭行力學舉萬曆戊午鄉薦歷五十年產不增置門無雜賓歆然如素士爲福山令清淨寧一愛士恤民以清直罷歸屢舉賓筵年八十疾革命死後不得用浮圖正襟而逝

鄭言字思行南廂人由歲薦授江西瑞州新昌學訓作興人文召諸生肄業齋房夜分親至各舍爲之勵時文風丕盛言力居多擢蘓州崇明諭歸時囊篋蕭



然杜門課子不干預外事與鄉飲大賓十五次年八十有九終

梁文燁號還淳東隅人瑛之孫也幼穎異好學以古人自期遇不平事輒持正排解之尤善事親先世未厝諸柩燁悉獨力營葬不涉族人領萬曆三十九年歲薦歷官鎮海學正加意育才凡諸生親柩力不能葬者每賻資之致仕十餘年與大賓數次卒子師孟另見儒林類

吳起龍字德溥西關熙春坊人幼聰敏篤學年十四補邑弟子員因食餼馬父一山以選貢入京 廷試久絕音耗龍思親念切遂携僕沿途尋訪及抵 都遍覓勿得時寒途勞瘁哀慟迫切至家成疾遇異僧施圭七乃痊人以為孝感所致尤善書楷草皆倣王右軍筆意遠近珍重歷試棘闈幾得復失者再應萬曆末年貢銓部考選第一授江西上猶令居任清慎有渠賊以苞苴直行餌龍怒寘之法士人仰望其丰采



焉歸林下督課子侄暇則詩酒自娛郡守魯史以總  
修郡志請龍與有力舉鄉飲大賓十次壽八十終  
朱文興字任卿東隅人少遊郡庠爲文莊重典雅試  
輒冠軍補廩後嘗讀書學舍中值文廟災急抱主出  
殘編襍被弗之問率庠友爲重建計而身董其役先  
是文廟密爾民居及旣災悉爲瓦礫塲興乃倡議與  
同堂生各捐廩一季贖其地歸學以免後患郡東靈  
傑塔方建始終興有勞焉郡志之修也總裁實出其  
手凡諸有裨郡治者無不竭蹶從事應萬曆乙卯歲  
薦授延平府學訓時進諸生而課之劍浦人文由是  
蔚興學使者鍾公惺校士至延檄所屬報劣興獨無  
以應鍾轉重之方擬薦擢會丁艱回籍不果服闋補  
山東朝城縣諭作人愛士如在劍浦時遷浙江處州  
經歷時年已七十遂告歸郡守阮公自華雅敬禮之  
造其門以鄉賓請年七十有三卒所貽子若孫者惟  
書畫而已



張于屏字綏侯童年補弟子員卽食餼事父惟謹及  
母黃氏孀居尤愛敬勿替萬曆乙卯舉於鄉自遷葬  
祖父母五柩殫心力不涉諸弟侄輩戊辰僅列副榜  
後令蜀之金堂甫三日流寇猝至屏督鄉勇禦之寇  
獲其侄鴻業劓目剖心弗顧也以援絕勢孤與久任  
城陷者同罪次子鴻儀匍匐走數千里擊登聞申父  
寃乃獲釋焉及里居則娛情書史課訓子若孫凡郡  
有大利弊必毅然陳之計八與賓筵

鄭之賢字立宇南廂六舖人言之孫也天姿靈異年  
十歲事父母以孝聞入庠後足跡不履公門以邑廩  
生應泰昌元年選貢天啓癸亥授湖廣澧州安鄉令  
初抵任凡里長馬戶夫頭例有常餽約千金許賢曰  
此陋規也卻除之永著爲令先是縣有驛馬四十匹  
悉派民間牧養供應往來無少休息民力疲甚賢廉  
其狀而申請改爲官牧民咸德之他如隆學校禁火  
耗懲輕生雪沉獄善績尤多會洞庭水溢邑中田禾



盡沒民皆就食他方稅糧無徵賢僅以已俸貳百兩  
抵解因課不及額調北直栢鄉諭尋罷歸舉鄉賓十  
二次

周弘機字龍中南廂二舖人天性端謹言動必閑規  
矩時以道學目之爲文沉勁雅贍沈文宗深器焉召  
肄業三山共學書院中機由是精理解著述甚富歷  
試鄉闈以數奇不售尤善堪輿郡丞萬尚烈建東塔  
造長春橋機與有力天啓丁卯以歲薦入北雍授蘓  
邵武府續志 人物 卷八 十四

張治本字平寰南廂二舖人平生孝友父母皆八十  
餘行年六十孺慕勿衰友愛胞弟尤愷至天啓六年  
歲貢授福清縣學訓陞永定縣諭再陞江西袁州府  
教授俱以師範端嚴爲督學所嘉舉鄉賓三次年八  
十六卒

鄭之僑字德潤南廂二舖人端直不阿敦孝友遵父



遺命讓弟產千金遇親友凡排解調拯無不慨然爲之天啓七年以歲薦任雲南大和丞愛民如子不忍以刑加上臺咸雅重之委攝廣通篆邑有富民居樓直逼琴堂前令欲毀之富民以賂免有援是以獻馭僑叱勿聽通邑咸誦其廉未幾致仕歸署府事延郡司李吳公嘉瑞知其賢以大賓請

王泰永字迺衡清節坊人性孝友言動不苟恂恂有長者風爲諸生數十年不履公庭順治六年以善人

邵武府續志

人物

卷八

十五

舉按院朱旌之由歲貢任龍岩學訓有新生入泮貧不能贄者槩弗問且優禮文學無愧師範值裁缺歸舉鄉賓二次

危用中字守公八歲失怙事母至孝年十四入泮文名籍甚訓弟純中成名登萬曆庚子科賢書兄弟同爨四十餘年無異心萬曆甲辰歲貢授泉州惠安學博遷四川大竹縣令清核錢糧懲劄奸胥甫一季忽遘疾卒於官士民悼之



張仕縉由歲貢任江南徽州府黟縣尹為人中正不阿古道照人爲士林所推重於順治十六年五月蒞黟維時海氛猖獗逃兵乘機變亂乃鼓集鄉勇精備器械發兵直抵祁界斬其渠魁劉養心等伍人殺戰馬三匹奪白馬一匹生擒先鋒李龍刃於通衢徽太守藺公愛其忠勇屢題叙該縣聯絡有方戰守有具賊來拒敵當陣擒殺可謂留心地方云云其他興利除害育士愛民種種善政不及詳載年七十二終於任

光澤縣

明上官希稷字師忠萬曆癸酉恩貢授浙江嘉興別駕催科政簡撫字心勞卑騎勸農興利除害民甚德之樂輸恐後輓運有功值歲歉發粟賑民典吏必以請後發稷曰拘法則民殍若待請將索民於枯魚之肆矣豈恤民之道哉冒譴吾甘之汝曹無與也活民者衆當道嘉其廉能有爲咸推重之後以直道見抑解綬乞休著攝生錄以行世



李子章天啓辛酉選貢崇禎庚午舉賢書授湖廣新寧令潔已愛民得爲政大體著武崗州事適岷藩爭立章按譜處置當道重之丁內艱制終補廣陽山令地近海連苗鼠爲難治章興利釐奸靡事不舉奏鼠擢雷州司馬會海寇猖獗章身親矢石守禦有方星報兵憲陳公之美發兵撲滅民賴以安後交薦晉秩中憲大夫政勤心瘁卒於官士民哀悼立祠祀之

李應年崇禎歲貢任福州長樂縣訓導端莊簡默誘

邵武府續志

人物

卷八

十七

迪有方陞青田縣教諭至任見文廟傾圮即捐資百金重建大殿署慶元縣篆值歲大荒公發倉粟以賑民得活者幾萬家壽七十三乞休旋里抵家七日而令終焉

### 泰寧縣

呂從文字岐陽篤學勵行由山陰貢選浙江常山縣訓導修學邵贄捐俸周貧署龍巖縣印時姻親李行人以出使道經其地文以一刺口謁外不交一談其凜



持官箴如此及歸林下積書累卷接文士無虐日貧者周之嘗置棺百具於定光廟中以俟貧死者取其有報聞仍給米助之又結砌明宦定定公父子墓老而好學應賓筵三次

江濟南字涵巽邑庠生沿例入太學選四川合州州同奉檄督徵著叙功欽賜銀幣在江津定遠二縣有去思遺愛碑致仕後七正賓筵置義田以贍宗族割居宅以廣類宮焚券贈貧捐貲解紛會縣督修鑪峰

邵武府續志

人物

卷八

十八

城級出私橐銀三十餘兩以給工匠不支綱銀邑令洪贊曰服官殫厥職兩致去思碑義田敦族好割宅宏類基排紛藉焚券素行罔或虧急公詎偶然城級賴以支造福真纍纍好義久不衰賓筵國大典非君雅不冝古道縱凌夷典型尚在茲言念江州牧高風齊峨岢

蕭聞字慎初朱口人天啓丁卯歲貢崇禎元年授廣西懷集縣令其地獠獍出沒不測掠虛劫獄以爲



常城每晝閉閤宇賦性溫平政治和洽頑慝革心凡  
建橋梁平鹽價制包侵率多惠政陞雲南沅江府通  
判以繼母老賦歸居林下二十餘年未嘗釋卷尤精  
於醫旨凡以病告者不論遠近不顧寒暑必往調診  
隨手全活郡邑禮於上庠者八次  
謝天秀由貢官順慶通判性端慤剛介有狷士風居  
官清慎約已愛民署篆所至人懷其惠

邵武府續志

人物

卷八

十九

建寧縣

徐大紳字篋光少時父禁其學弗與賞公嗜學愈篤  
其從祖源述深器之公常就彼乞米袖而之古廟中  
晝夜讀爲督學黃安耿公所首拔旋命預府學諸生  
試即超食廩餼益異數也次年科考冠府學即舉於



鄉越歲登第爲萬曆壬辰榜授嘉興府推官諭一考以清介忤鄉紳僅遷寧波府同知丁酉庚子分考江西浙江竟以是年卒於任年僅三十五宦橐蕭然在浙八年歷兩任皆大郡僅構數椽以棲四子田無半畝之增子孫不免凍餒可謂清操絕俗者矣歿十年慈谿馮公挺來督閩學特祀公於鄉賢祠馮公寧波人知公浙中之政爲不誣

李春熙字皞如舉人秉紆之五世孫萬曆辛卯領鄉

邵武府續志人物

卷八

二十

書戊戌登甲第歷任南直太平廣東肇慶河南彰德三府推官北刑南戶二部主事公在太平凡應安徽寧池廣六郡有寃者俱爭就太平理賴以活者數百人嘗有殺人者數年不得主名公輜軒所至必得賊乃去築楊家壩梅塘圩護民田數千畝且護城民食其利不費公帑一文後十餘年公過其郡百姓手香以迎追送數十里其在肇慶監軍征交趾禁妄殺削冒功即俘獲交人而非入犯者亦遣歸又活千餘人



捷聞當殊擢以不通京師書僅稍遷刑部主事在部  
掌六曹章奏所論救彈駁皆人所難言最赫然者論  
奏代王禹勾父子一案載在皇明通紀其一典禮明  
彛倫存國是辨李文節廷機之公清折諸貪人之賄  
獄疏雖留中不報而直聲震天下矣然竟以是謫彰  
德稍遷南戶部筦庫筦倉筦兌歲省費數萬而輸解  
者頌聲溢津馘矣又讓樵關之最腴者不居曰吾奈  
何少守貞而老倚門也竟以名高取忌乞終養歸歸  
郡武府續志人物 卷八 廿一

而築一室以養母室未成而公卒郡守阮公祀公於  
鄉賢祠其所著詩文集梓未竟  
廖成賢字赤許在城人少負氣誼重然諾遇事剛果  
直行不肯脂韋隨世歲壬寅學宮燬公倡義重新任  
勞任怨鬻已產以資其不足不令人知萬曆己未以  
貢謁選授和州判官有能聲陞靈川縣知縣未任丁  
內艱服闋補永淳縣縣固粵西之僻瘠地也民染徭  
俗士不知學公至循循以禮義誨人課士文業陋風



大變而且虐心以決久滯之疑獄捐奉以築水圮之城垣纍纍善政上下交譽考績時旣膺兩臺最舉矣  
另又蒙臺省令疏題獎正擬上遷奈病卒於官

徐中台字伯朗在城人由貢生揀選惠州府通判判有兩公則職督捕也惠之四區攢山瀕海深菁荒洋鷓冠嘯聚搜剔甚難公至廉得其要領思弭盜必先清保甲毋論在城與鄉每朔望限各親遞有無失事之結狀繩以連坐之法旋即擒巨窩陳采真盜魁陳

邵武府續志

人物

卷八

廿二

敦弟賴亞三等次第解憲正法萑苻斂跡他如督修城垣操練精壯禁八槳之飛渡緇船戶之號籍江氛稍靖皆其力也嗣而署歸長興三縣事讞獄徵輸愛民課士具有循吏之規按院李雲鴻特薦爲粵倅之首隨擢廬州府同知坐轄江防值流寇出入之嚮扼要水陸盡力拮据忽遭國變歸里養親嘉遁以全其身亦進止有道者矣

聶芳字桂侯鏡村保人以明經授巢縣知縣巢界江



湖之間地瘠民刁舊令以不能官而羈留者數人公  
至更絃而奏務與民休息持已以潔事上以恭征輸  
以時刑罰以恕督撫監司每課吏治輒以公爲江北  
諸令冠擬舉卓異他如招撫湖南保之流民均二十  
里之糧冊而且新縣治飾譙樓修學宮創橋廟凡有  
利於地方者皆力成之七年卒於任

劉冀宋開封府尹容坊保人其父先流寓於江西廣  
昌縣是以舊志失載今其後裔大叅劉伸兵部郎大  
年知州大鞏等仕宦纍纍既於先朝請兩臺學憲檄  
本縣崇祀鄉賢矣且其政蹟懿行雖不載於郡邑志  
徃徃見於他書故爲補入

孝友

王一章字君恕南廂人天性純孝持已端方家貧力  
學既爲諸生父每出遇雨章親持雨具以往雖夜分  
必持火謹候曾值父疾夜焚香禱祝願以身代翼日  
乃瘳母蚤卒繼母某氏性頗嚴章竭盡誠敬得其歡



心居喪盡哀寢苦枕塊如禮既葬每遇大風雨及節朔必奔趨墓所省視至必悲泣撫院佟按院成俱旌孝子常爲子訂配後女患痿痺女氏使人語章請別娶章勿忍棄竟娶歸命子調治之尋愈晚年潛心理學德業愈進年六十八病革不能言取筆屢書毋自欺作好人十餘紙親友爭相持去所著有闢異說醒酒說二卷未刻

明官懋勳字德甫郡庠生天性至孝尚理學長從豐郡武府續志

人物

卷八

十四

城徐匡嶽先生遊講明修身爲本之學毋死泣血三年廬於墓通郡稱之崇禎間舉孝子年七十有八與鄉介著有孝思錄孝經註釋

孟養浩前朝邵武衛鎮撫家中落不能克饘粥值母病危浩哭禱於神割股和糜以進母病尋愈及母死浩哀毀以終

張希聖八都太源人生母楊氏年六十七左脚忽生一瘡三年醫治不愈聖清夜焚香告天將已左脚割



肉如瘡大稟命於母曰時得一藥兒為裹於母之瘡處惟愈方可解脫切勿私自窺視瘡過半月而愈母因瘡愈每欲持素聖代母清齋三年易母以暈食時軍廳卽署府任以孝子獎之至今相傳張孝子云許魁卽邵武舊衛軍也天性至孝家貧業樵竭力養母母素喜菓百計供甘惟恐不得其歡心一日母病思炙魁割股以應

黃金鉉字守正天性茂淳潔清自持髫年失父事母邵武府續志 人物 卷八 廿五

余氏極其誠敬家貧力學菽水盡歡鄉黨稱其純孝康熙六年三月僉舉孝子奉張部院行陸學道查獎且勉弟崇儒倡修聖殿素行所感已登孝廉

杜杰 撫院佟給扁旌表

張鴻譽 按院朱給扁旌表

張鴻舉 按院成給扁旌表一門節孝

何煒然 按院李旌表

李如日 學道陸給賞旌表

光澤上官世安字時震邑庠生天性孝友秉秉仁恕事父母晨昏敬謹母病日時以舌舐之未幾旋愈人咸



謂孝感撫弟世昌聘娶均產策勵入泮族里推焉且平居無疾言厲色而周給排難歲荒平糶有貸不能償者輒焚券恬淡嗜書善談道素別號侶陽葺數椽於溪山別墅放懷魚鳥著娛情集三卷行世

泰寧廖應龍依口保田民也有母老而瞽奉養唯謹順治七年九月十六日昧旦忽有千餘游兵破依口長關老幼奔竄龍率弟負母前遁自執鋌踵其後兵將逼矣龍一人且却且拒如是者久母得以全鄰亦有焉以棄母與全母者較而論之則龍與魏志內鮑出擊賊還母事同一轍可嘉尚者矣

建寧李崇教邑庠生性嚴毅耐勞苦貧居陶然自適父病割股和藥以進父乃立甦厥子萬捷克承家訓母病捷乃割股投藥中母飲之而愈知縣王良臣申詳督學鄭公三俊以奕世克孝旌之恒誨其子曰人生惟耕讀為要其壞人心術者不足為也



李明賢赤下保人質性端謹母亡後卽斷葷茹素念  
父老且多病晨夕侍寢處有故外出雖丙夜必返及  
父歿遂於停柩之旁苦寢其側凡遇飲啖必肅容先  
獻如是者十九年通庠上其事直指李公賜以孝聲  
茂著扁額

儒林

梁師孟字太岩順治五年恩貢考職別駕秉性剛方  
遇事果斷守己以正持家以嚴崇禎末年諸寇倡亂  
邵武府續志人物 卷八 廿七  
空城逃竄孟獨恬若無聞年登八十餘卒其子若孫  
俱賢且孝恪遵家訓與人頌焉

曾思孔字一吾邵武邑庠生鄉賢真保之裔也事母  
菽水承歡疾則躬侍湯藥常赴三山試有賈附舟遺  
金五十兩孔得之戒舟人姑勿解纜少頃賈哭至孔  
亟提金還之賈請以半爲壽孔力拒勿受授徒百餘  
人廉直端嚴無愧師表年八十六舉鄉賓邑令袁公  
崇煥嘉以扁曰潛德儒宗



吳應鉉字穆生郡庠生也資性聰敏少負大志崇禎末年闖賊犯逆聞京都失陷絕水火者七日夜號哭骨立而死其友李欣春素與吳善聞吳死亦悲憤相繼而終

王錫祉字繁倩宜春坊人少穎敏善屬文以髫年冠多士時督學王公滌深歎賞之崇禎癸酉科房考趙公珽拔取首卷大總裁亦爲擊節以字越額數遂置副榜家貧事繼母以孝稱兄弟友爱尤篤應順治八年恩薦授通判銜年五十六

邵武府續志

人物

卷八

廿八

王之賓字贊堯十四都洒口人髫年補弟子員三試皆冠軍爲人端方慷慨雖燕處必肅衣冠雅好施濟凡脩建橋梁道路施棺木置渡舟力所能爲者無不爲之應崇禎辛未科歲薦年八十終

徐大用字寓庸南廂達道坊人邑廩生生平謹厚儉質篤學不倦以孝事繼母友愛幼弟舉優行應崇禎四年貢年七十一卒



蔡奎字左婁南隅人父廷俊原籍衛百戶雅好文史  
督子以學奎乃潛心舉業事父並繼母拮据承歡貧  
無少間甲午補邑弟子員矢志行善諸凡言動悉遵  
先軌且喜酣咏然爲文益高華逸曠科試學道陸公  
嘉拔遂餼之丙午登鄉薦第一明春父歿奎公車歸  
祭葬咸如禮而奉繼母尤厚年三十八遊還卒建州  
道通郡悼之

光澤黃正標字伯準杭川人始生岐嶷雋穎方角卯入

邵武府續志 人物

卷八

廿九

鄉校長益務學博物敦行值戊子寇火之餘丁少田  
荒稅額不減徵徭騷然標著數千言條其利病以達  
當事由是蠲荒徵熟之令下民稍蘓焉壬辰寇訐親  
知流離標貧甚家無兼辰之積嚴冬時衣單衣輒約  
已周人無吝色爲文宗唐宋大家雋才逸氣每下筆  
浩然甲午登鄉榜授山東青城令未任卒

文苑

明邵武朱德政字星衛南廂人天性耿介不與人世



緣卜築白渚溪上日誦咏其間韓歐文皆手錄以讀  
故為文如行雲流水有大家風味崇禎辛巳文宗郭  
公之奇補試政五藝立就遂入上庠由是聲名藉甚  
逆民某欲以女妻政許撥奩田叁拾石政厲色拒之  
其節行不奇如此所著有毛詩補說未竣而卒

泰寧江嶠字惟鎮松淑朱子之學孝弟端謹篤志力  
行以五經教授鄉里嘗語學者曰正心誠意在格致  
後原非一味寂守當時時時持醒此心使動無不當便  
邵武府續志 人物 卷八 卅

是身脩見羅呼為老友世稱仰齋先生  
揭日字中天淳厚博學異典秘笈無不淹貫為人循  
循履道毫不妄及以故士出其門者皆品行卓立孝  
事繼毋曲盡其職天啓間試優等應籛本學具文申  
補適毋喪有勸以俟文動報憂日力不可讓於下手  
學憲歷舉德行人皆敬之今沒三丁餘年子嗣武微  
敢志之以深品行之節

隱逸



丘嘉彩字白夫崇禎丙子舉人崇祀鄉賢教諭丘秉忠之次子器宇不凡姿性敏異以綱常名教自任凡事有關於國家之大者莫不殫究若邑有議興革可貽久安者皆侃侃不辭乙酉年應監軍閣部傳冠之召歸遂挈家奉母於白水滌之肖岩岩極陡峻題曰尺地可安幸妻孥能偕隱高天堪問與日月以爭光自採枯枝摘野蔬以度活庚戌秋將父遺田宅盡付侄萬瑛因授詩曰余自當窮厄含悲藉汝賢傷時遭

邵武府續志

人物

卷八

卅一

不偶惜節暗相憐澗藻逾秋潔山松更歲好寸心珍重在日月佇高懸足迹不入城市者二十餘年所著有易經妄測三師友志悲秋等集標字畫之款曰丘園邑令洪詩曰季世功名薄所遇隨遭逢苟圖抒壯行但言俱在公赫赫擔圭爵堂堂秩保官徒然耀金紫大義等虜風丘生邁世雄感慨心忡忡讀書淹六經胡乃數奇窮願挈妻孥隱尺地且韜躬綱常名教責暗自傷痴聾家世亦云蘧田宅頗云豐一旦付伊



侄等之若毛鴻高天不可問素心乃轉恫守雌今已  
矣浩嘆兼山翁

鄉行

附錄

明陳九臯字汝孚南廂人郡增生爲人淳厚不欺年  
五十乏嗣諸友勸其置妾臯勉從之乃積三十金娶  
某婦婦年方少見臯已艾有怨色臯遂送婦歸原聘  
槩不索償里人義之文宗熊公尚文按臨戒提調者  
毋濫舉優行試之日命通庠公填卷面衆皆舉臯因  
拔置優等續妻生子一以爲厚德所致云

邵武府續志

人物

卷八

卅二

官慶 字祥甫南廂人琚之曾孫爲人剛直樸誠慕  
義好施凡脩郡學建輿梁皆捐貲助焉且施藥濟人  
族鄰人有貧者咸給粟以賑衆重其德御史龔公表  
其門曰尚義舉耆賓旌以冠帶

何達字非爾邑西古山人穎異孝友由諸生挾策南  
雍博洽無方以獎掖後學爲已任本境田瘠水艱稼  
數不登達捐資修築濟川陂圳溉田千餘頃遂成沃



壤里有畫錦橋毀於陽侯達獨鳩工龙村重建新  
丘元舉號鏞山藩司司椽也世居城東郭外樂善好  
義嘗施棺於人人有不能葬者悉捐貲以代瘞焉  
張俊英滌霞人生平尚義曾與明季鄉賓治東下坑  
橋爲踵接孔道天啓末洪水圮焉英先捐銀二百兩  
創建闢沙磧丈餘蟠其址上則屋楹秩然永且固里  
中至今猶稱之

鄧鳳梧拿口人順治丁亥年建州陷邵界山寇盜起

邵武府續志

人物

卷八

三

時江西兵至拿口抄擄焚殺繫梧馬前加刃於頸令  
先遁索山中富室梧寧死弗從兵立磔之其村落知  
交皆免於難

吳拱德十二都龍峰人順治戊戌年隣寇楊寶入界  
掠男婦九人德子亦在內寇索贖德傾橐持三十金  
請寇所欲併贖九人寇憐其義許之更令益以十金  
乃可德跪曰九人饑疲命湏臾矣能再延一日夜乎  
求釋衆人以吾子質於此寇即遣八人還德再貸金



往乃易子歸

謝光惠字連若府學廩生孝行醇篤勤脩嗜學毋怠氏病三年朝夕親湯藥調飲食每夜焚香露禱併率弟妹泣叩灶神毋病漸愈常董修學宮凡捐助給工出入無所私學憲宋公陸公皆以優行獎之

光澤縣

上官臨在城一畝人選授州同戊子寇亂田地荒蕪人民僅存什之三額糧一萬三千有奇邑令奉上招

邵武府續志

人物

卷八

卅四

集勸墾僅熟糧五千餘石而徵比則仍照額糧時邑令高爽詳請除荒徵熟卒不獲免嗣康熙元年撫院命司李龔廷擢查實報部君即慨然自任偕庠生陳大雅領文赴省叩諸上臺導行部費約三千餘金邑貧莫措偕率衆里貸之藩弁遭其摺算藩卒絡繹不絕衆終不能完致臨竭產獨賠二千餘金亦無怨言處已猶益恂謹邑有大利病咸容規畫家訓謹嚴其子銓童而英敏能文應成利器



龔上策在城人事親最孝娶妻黃氏相夫有道奉舅  
姑尤加敬謹勤儉治家年二十二卒遺子四人上策  
以妻有內助毅然不再娶懼後之來者不能如黃氏  
之克養我父母也自是事親勝婦在而加勤教子倍  
篤生平慷慨方正濟難扶傾宗族鄉黨咸稱為義以  
成孝者

### 泰寧縣

雷一聲號禹門自稱無裛居士孤情峭性不屑為今

邵武府續志

人物

卷八

卅五

人幼穎異有大志與李大司馬同學友善司馬貴顯  
後三十餘年不欲一見祖塋為人所侵父鳴春破產  
直其事族衆償以圭田一聲引范文正芳規勸父勿  
受以存明裡大典族衆多之邑令洪美之曰余鄉大  
宗伯董思白諱其先生與理學陳眉公諱繼儒小先  
生學相師友及董貴顯而陳不往董因構一樓曰來  
仲蓋望仲醇之來也兩人風義何等今閱雷遺事正  
相彷彿雷之高不僅此也勸父勿受圭田以存明裡



大進二與文正義田事合賢哉雷子寧獨族人多之  
世當共多之也

江豫字象予太僕日彩四子耿介豪邁有國士之風

生平厲廉隅疾惡如事關紀綱義形於色崇禎間鄧

寇蠱亂於鄉見祥異志皂隸夙蠱於邑豫倡義兩請於上

剪除之明季亂成知時事不可為遂決計肥遯及兩

京陷清兵入挈家避地南石砦以世受國恩義不屈

辱乃自矢曰與其泯泯而生曷若轟烈而死兵抵境

邵武府續志

人物

卷八

卅六

攻皆豫躬操兵械率衆捍陴及城潰豫格鬪擊殺敵  
者身被重創而死

江復字來初豫之弟性寬厚和藹恂恂有孺子色與

寒士交以兄事之時周人之困則鋤其德色意欲如

也然義所當爲又勇赴焉明末慕石朝山巒奇峭挈

家而隱清兵入境臨難不易其志同兄豫俱慷慨就

義妻戴氏亦赴壑而殞 豫復二子幾於商之義士

周之頑民矣然許由洗耳無損帝堯之神聖夷齊扣



馬不失周武之顯名士固有志何至相迫藻光亦言之矣况清朝褒揚節烈風示來茲崇簡宥之規無忌諱之加乎斯裨野所必錄史乘所不遺也矣

何文衡禮部儒士性孝友循謹足跡不履公門兄文付早世妻吳氏茂年孀居調恤備至全其貞操從叔何冬貧老無嗣衡割屋棲之終身贍之邑人黃宗應貧賣墳山酬直三十金廉其已葬不忍伐墳徑還券不索原價天啓四年邑令朱仁臣舉善行崇禎十四年通庠舉賓筵邑令洪公稱其孝友著聞約已周物洵有古君子風

邵武府續志

人物

卷八

卅七

蕭達字字太如至性純孝兄聞宇赴選父天留歿達獨任喪事如禮平生喜博施無機事還田焚券設策賑荒寶蓋岩再建青雲塔合尖所費皆鉅邑令余蛟翔親請賓筵詳見邑令王譽命墓誌

江良珍性介毅不屈教授鄉閭皆率以正遇相爭不理者必直決是非以息其事有妻兄梁雲橋者饒於



貴無子而歿珍不利其有主其侄繼之侄梁正顏為  
珍之甥具禮致辭珍直拒不納且引舅犯訓辭不居  
功為謝後以斗愈敏聯捷南宮誥贈文林郎入稱其  
德之裕後也

羅鉉博學多聞應例貢入太學聲振京華世居邑之  
南鄉大湖富於貲凡逋祖負債焚券不取惟稍潔節  
畱自愛嘗曰吾不敢以先人鉅貲侈靡也與弟鑑異  
毋而生友愛之篤出人情意度之外其所居鄉地形  
陵之勢平地起矣福蔭一方人共德之

涂文煥質直無私兄產蕩盡仍取已資均分其侄無  
少吝惜又長於經畫故學宮文塔有造皆舉煥以督  
成之郡邑大夫皆有額旌

江兆球字公受厚重端慤循循古處有狷士風孝友  
為其至性與弟兆益事母恭謹克順無不至焉及死  
兄弟粗築土室廬墓三年未嘗見齒開塾講學多所



造就義方訓子皆籍庠序後以恩貢未究所爲

而終

### 建寧縣

明鄒大猷號星臺以明經授松溪縣訓導陞長沙府益陽縣教諭不赴致仕歸歸而舉鄉飲者十然後卒公舉止翼如也容貌藹如也其治家肅遇族睦與人交朴而有禮端居寡言自邑至鄉無不曰鄒先生長者也傳經授徒其弟子半庠序亦有以甲第勲名顯著然未嘗以齒德宿儒自居與小生遇必均禮雖乍

邵武府續志

人物

卷八

卅九

見必訓以格言此先民之遺範也

清熊臣忠字亦良在城人生而穎異丰儀俊偉篤志潛脩中順治甲午鄉試第一時年僅弱冠發榜日坐鹿鳴筵首監臨主司目忠咸嘖嘖有玉山照人之羨幼與吳生師聃同硯席忠有女心許與吳婚未成禮也發解後有富人願納二百金求爲子婦忠峻拒之竟以女歸於吳其操行貞介類如此乙未下第南歸暴病卒於中途



吳鐸在城人以鹽筴起家生平好行其德嘗往來  
山道經困關值蜀人爲三山驛丞者未抵任而死資  
斧乏絕止遺一婦一女喪不能歸困關賈監惡少聞  
女有殊色相目爲奇貨可居因爲稱貸殯殮費將鬻  
此女於平康里且陽爲女議婚婦飲泣從之計定適  
鐸至衆具以告蓋欲令先薦寢於鐸得夜合貲償子  
錢家債鐸入室叩婦曰若蜀人有商且宦於此者乎  
曰有中表某丞浦城奈遠何鐸遽諭遣諸少惡出橐

邵武府續志

人物

卷八

四十

中金召子錢家悉償之旋買二小舟一居毋女一居  
已徑送至浦城下丞果迎入鐸不告姓名而返  
朱臺黃惠塗人耳義相結而爲賈兄臺而弟惠兄行  
賈弟居貨兩人一甘苦出入弗籍盈縮弗稽迨貲盈  
畝益則質劑書一姓掌握任一人且兩家娣姒雍睦  
臧獲趨事如一主後臺族有胥而盜庫鏹者累臺償  
五百金惠取兩人公帑償之臺有子二惠子一迨析  
產惠欲以子爲率峙鼎足而爲三臺欲以身爲率剖



珪璋而爲二此亦近代之哀桃管鮑矣

熊圓長吉人雅志尚德凡遇凶歲必開困平糶以爲閭里倡或貧甚莫措者貸與無吝色丁亥歲大饑佃戶租額逋至貳百石槩捐之不取縣令孫公給高義可風扁額旌之圓從侄信貧而早死力爲撫孤迄今孤壯矣且遺命創三溪橋載在李嗣元記中附後謝聖伊號魁宇事繼母至孝母不悅其妻伊出之繼妻有娠矣母不悅又出之其父曰嘻甚矣命迎其婦

歸伊賣藥救病好行其德貸貧人粟多不取息客河南值荒疫問症施藥所活甚衆有僕供役十餘年一日召其父來曰汝止一子長事我誰其養汝竟還其父且畀五金爲質遷資有鄉人遺金於途伊捨之久待其人還之伯世達老而孤無所倚伊奉於家始終如一凡族塚之失祭者及無後者皆爲之甃砌立碑他如瘞暴露施棺槨貲贈貧而難婚者皆出自本心不求名譽



附義夫

李天毓廣寧坊人補郡學生常推館穀以贍兄侄年四十喪偶義不再娶明季以廩拔貢高蹈不仕郡東長虹橋復建年月皆其手擇且捐百金以助順治六年按院霍公達以義夫旌舉介賓年七十三卒時敏字勉吾在城人係邵武衛百戶少年喪妻矢志不娶至天啓四年鄉黨公舉義夫按院喬 獎賞旌曰義高雄雉

邵武府續志

人物

卷八

四十三

蔡南星字瑞夫南廂人生平嗜學閉戶不出為人端莊敦篤與人接春風和氣年二十五失偶卒不娶里人以義夫舉壽六十餘終

江孔殷號豹隱泰寧縣人寄居樵郡幼以孝友聞其言毫無所苟髮妻吳氏亡殷自廿餘歲誓不再聚惟以筆墨詩詞怡情于山水而已

列女

明李氏王纓妻明經新德其子也氏歸纓年僅十八



纓卒氏水漿不入口誓欲偕亡有論之者曰子孕懷三月矣保驅以善後所全大也氏悟隨祝曰願得男雖緩死可也及娩果舉新德氏復祝曰願長而成名雖不死可也因以成腹名之孀居五十餘年年七十  
八終

陳氏朱文質妻質早夭無嗣氏年二十有一遂矢志守節立侄鼎祚為夫後凡錢穀出入悉自綜理日督女媳績絰事夜分佐繼子讀弗倦萬曆丁巳鼎入庠氏喜得其後乃以家業付鼎年七十三卒

邵武府續志

人物

卷八

四十三

甯氏明孝廉吳嘉泰妻性貞淑尤喜樸儉歸吳後其守菴鹽每以勉夫科第為志萬曆丙午泰得薦凡公車之費悉氏脫簪珥資之未踰年泰卒遺子穉甚氏矢節撫孤內外家政井井未見有厲色疾言人皆稱焉年八十

黃氏邵武府學生王錫榮之妻邵武縣學生王元颺之母也蚤年錫榮喪五十年教子成名操如一日且



其家甚貧而貞志不渝順治戊戌間曾經旌表年七十五終

甯氏端娘古山何通妻性溫惠事舅姑以孝聞年二十七而通卒遂守節不二稱未亡人者四十餘年常躬親織以佐子讀子童年八邑庠康熙七年里人以節操聞于郡邑氏年踰大耋未及褒旌而歿

王氏故民何天根妻也天根為進士何望海之子早天無後王氏毀容椎髻矢不再適已而望海卒亦無

邵武府續志

人物

卷八

四十四

嗣氏志弗移家無應門僮僕足不履庭雖宗戚罕覲其面年六十餘全貞以終順治五年士民僉舉節婦黃氏貞娘庠生張民望妻早年寡居節凜冰霜撫孤成人按院王朱二公二次扁額旌表

李氏住迎春坊夫黃時達卒氏年二十七守制至八十三歲其間寒暑遷變歷幾盡矣己卯年署堂事刑廳黎公旌以扁曰貞操凌霜

張氏住寶嚴坊夫

以瑜早喪氏年二十誓志苦守不



事膏沐聲不外聞遺腹產男撫養勤劬家貧績紡以  
延師且姑係晚歸而氏事之如親母其公亡時氏必  
誠必信不啻夫在也慈順素著女德俱全

李氏郡庠生危科之繼室長子非已出撫愛如珠次  
子氏生訓誨有方翁姑俱之任氏獨留家鎖鑰親操  
絕不已私視諸侄猶子事諸妯娌如母其媳王氏係  
次子衍芳妻芳死氏年二十有七慟傷幾於滅性長  
子猶在襁褓次子遺腹氏俱育之成立姑媳辛苦計  
邵武府續志 人物 卷八 四十五

守節五十有九載

胡氏故民李廷熾妻熾死氏年二十有三其子如日

方穉氏多方撫育成立補邑諸生康熙三年通庠公

舉德行母道有光矣奉撫院

張劉

給扁旌表二次壽

近九十而終

黃氏古山虞閏四之妻也順治五年江寇入境大肆  
剽掠氏為寇所獲悅其色欲逼之氏義不受污遂抱  
嬰孩投地而死是後更靜月明之夜每見一女不



亭獨立

陳氏名炫邵武界首人華暘之女江亘南之妻也能讀書識大義辛卯正月間寇從潭陽至氏投河蒼頭周文順拯之乙未六月十七日寇復奄至驟入其家驅氏行氏誓弗從寇刃叢氏頸迫之亦不行寇強負之氏從負者背咬斷其隻耳以血唾之寇貪其色終不加刃氏罵不絕聲遂殺之寇首聞其烈狀亦索負者殺之時氏年三十按院成給扁旌其烈

邵武府續志 人物

卷八

四十六

高氏十四都陳周四妻順治戊子年為郭兵所擄負至對岸石崖其下深淵莫測氏即投崖溺死三日後尸浮原墜所而出面色如生鄉人稱為神異

陳氏故庠生熊明德妻年二十六歲守

及七十貞節無疵

劉氏拿口鄧儉妻也儉死時劉拊棺哭曰吾已孕三月倘生男必不負死者後果得男順治丁亥年江西兵至大肆殺擄驅劉氏母子行劉牽其子曰我十七歲作寡婦至今守此一子今日母子二處死耳兵亂



刃砍劉頂血出暈地兵去乃甦剪去血髮髻剃塗創  
二年始愈

晏氏里民張新甫妻奉侍姑嫜供歡菽水戊子年土  
寇猖獗氏於十月初四為亂兵所獲義不污身伏刃  
自殺時年二十有二

張氏

民杜學弘妻蒙  
撫院佟給扁額旌表

毛氏

儒醫時登瀛妻蒙  
按院朱給扁額旌表

何氏

民張光瑞妻蒙  
按院李給扁額旌表

光澤縣

邵武府續志

人物

卷八

四七

李雲龍姑中憲大夫子章女也適邑庠生上官亮姑  
瘋疾躬承盥櫛勤慎弗怠戊子罹亂夫亮偕氏避居  
西鄉鄰省寇突至家人覓筏渡河甫登筏而戎馬蜂  
擁矣氏恐為所執携五歲子上官生付婢囑曰汝快  
抱小子逃生我不及見汝主矣即拔簪拴髮躍身落  
水越宿夫祭江尋屍屍隨浮於沉所面不改色按李  
氏自變亂居恒語婦輩曰女子不辰遭逢亂世遇兵  
遇寇惟有一死死可全節適愈於生至是果如其言



都人士士賢之邑侯林公嘉其節旌以詩曰何以捐軀  
入水洛祇緣寇發未曾平纔臨沙岬乘桴計倏邁霜  
旗統曉明大節克全能取義純瑜無玷自成名柔腸  
却勝剛腸烈踴躍波心萬古榮

聶氏攀姑即子章次子雲漢妻也年十八適雲漢甫  
數月值亂避居西鄉隣界寇發戎馬逼至氏徒行避  
之被執脅氏同去氏不移步旋砍一刀氏厲聲曰寧  
死不從汝行頭可斷身不可辱連砍十一刀氣絕里

邵武府續志 人物

卷八

四八

人同難者匿於莽中所窺見寇退報知次日雲漢殮  
屍歸塋之是日同殉烈者子章女入於河媳殞於刀  
時稱雙烈邑侯林公以其事上聞有詩輓曰臨難捐  
軀命非圖苟且存成仁全大節守義正彝倫斷臂緣  
堅志捐軀殊慘魂今時真烈婦旌與智仁聞教授王  
合而吊之曰先生道學有其源雙節轟轟出顯門殆  
若有期同日死安然捐命不呼冤千刀莫斷堅貞骨  
一水能生氣節魂含笑九泉無點恨萋萋芳塚老乾



坤

李氏邑人陳其謀妻也年十九夫逝生女不育立志守節抱侄南傑乳爲己子事舅姑以孝聞處妯娌以和著人或勸之諷之氏若罔聞撫子在懷私心自幸曰吾無子而有子夫死而不死矣志足矣于萬曆二十年直指喬公採風入告旌其門曰冰清玉潔氏知書識字誨孫大雅目見其入泮年八十而卒

彭氏年十六適邑人李天錫未及週而天錫歿幾欲

邵武府續志人物

卷八

四十九

貞殉矣遺腹而生男贄艱苦撫孤事舅姑以孝聞逮贄補弟子員入國學選授北城兵馬副指揮克承母志崇禎甲戌年繡衣路公採風旌其門曰青齡勁節訓諸孫皆業儒孫正紳補弟子員諸孫皆貧而學不輟氏真苦節裕後也享年七十有五

葉氏邑廩生黃大緇妻年二十四而寡奉八十姑撫三歲兒事姑以孝聞逮子尚猷甫長延師教誨剪髮和丸卓有古風崇禎甲戌年邑人僉舉直指路公以



事聞旌其門曰貞節丁丑歲子歿復殂遺孫二人教  
誨益嚴皆次第補弟子貞是時氏年已七十媳王氏  
恪遵貞訓共勵冰操亦以孝節並著丁戌子亂孫應  
吉奉氏避于鄉遂告終焉造次瘞荒蕪之區越五年  
擇吉改葬失棺所在號天悲慟恍若有人導其前而  
棺適露迺舉與祖合塋焉人傳云生貞死靈裕後成  
名合塋獲吉志遂目瞑我人頌之永示先型

李氏者邑孝廉何本盛媳也本盛繼母生四弟皆剽

邵武府續志 人物

卷八

五下

悍盛登賢書後赴選遊州守未任卒繼母弟謀毒其  
子有謨啖以粥寘毒其中方咽而毒作奔歸嗔目語  
氏曰吾中毒今已矣而年艾男四齡冤何由雪吾已  
矣柰若何語竟尋逝氏撫膺哀痛矢以死白冤力懇  
諸憲臺百苦備嘗閱十餘年不得報有謨精英迭現  
時聞號泣聲氏志益堅遇中丞朱公廉明親鞠立獄  
三宥有謨自此號泣聲不復作矣奉姑益孝謹誨子  
其晃弱冠補邑庠生書香得以不替崇禎丙子歲張



冢墓旌其門曰節孝兩全

李氏庠生郭緯妻也弱冠蜚聲藝苑齋志以歿遺二子一女孳孳撫抱將終顧謂氏曰吾志未成冀二子有以繼之然汝方青齡其若之何氏泣應曰誓成而志也栢舟自矢事繼姑以孝訓二子以勤弘與毅果第冠軍及女嫁男婚氏仰天嘆云可以報亡人於地下矣自是食減憂傷病革訣二子曰我死必與父合壟使吾魄猶相依也其苦節嚴訓士庶咸稱為不可及

邵武府續志

人物

卷八

五十一

李錦娘原任建始縣令恩之女孫也適庠生江筆彩而艱於嗣氏勸夫娶妾以圖宗祧夫貧出奩貲以助洎妾林氏生子宗海而妾死氏撫育不啻己出夫被難宗海方五歲母子伶仃家無長物氏年未三十辟纁教子期于成立值兵戈擾攘氏毀容斂跡撫孤全名以節終

黃氏邑先朝奉議大夫文魁女孫文林卽以昌女也



配郭蛟甫五載而夫歿遺孤三曰敬曰任曰時氏年二十有一哀毀踰常必欲從死舅姑暨父母泣謂曰而夫雖逝煢煢三子誰其撫之死節全孤孰優爾其裁之氏意亦少釋自是事舅姑益謹訓三子益篤次子任髫齡補郡學生值戊子兵荒備嘗艱苦舅姑旬餘相繼而歿僕遜子幼喪盡哀殯盡禮人莫不敬服焉順治十六年繡衣成公旌其閭曰彤管流馨今年七十三子八孫訓誨不倦

邵武府續志 人物

卷八

五十二

黃氏幼失父與母相依十五配邑人危必奎事舅姑以孝聞生二子曰煥次曰樞年未三十失所天值兵荒薦臻携二孤歸母家朝夕紡織不輟上飯母而下粥子糠粃自甘豪族有知其賢而貧欲奪其志者氏引刀指天誓以死殉里閭肅然起敬今六十矣而母八十在堂氏冰操愈勤教子愈嚴事母愈孝子樞童試即冠軍而餼莫不稱令母之可風如此

官氏北鄉梁大言妻也年二十二孀居撫孤閨訓甚



肅歷遭兵火矢志不移戊子年亂氏携兒媳逃避深山投荆阻溺並日饑劬與子以死自期及庚寅復罹寇變身赴清波救而獲免堅貞勁節里黨哀之屢蒙上臺表其門

李氏汪氏張氏大田庠生廖愈達之一妻二妾也清兵丙戌年九月四日抵邑達於病中先期挈家登岩三婦皆有殊色自相誓曰國破家亡辱無不至兒女子決難自全迨破石輞李遽投崖如飴達又與汪張

邵武府續志

人物

卷八

五十三

他遜覓得一丁詎斃薄爲兵所矚喊殺震驚張亦踵李而去未幾達捐金得令箭以防身汪從容告達曰妾所以後死者扶君病故也今有令箭君可全生以奉公姑矣即撒手懸崖左投右反筋骨俱碎逸士雷易有傳並詩邑令洪公有詩在藝文志

蕭氏朱口蕭德亮女嫁本保朱子長丙戌秋避兵于椒坑兵破石輞路經其地氏抱子被執因賺其兵曰我抱兒不能走汝若抱之願同行其卒信而抱之氏



乃投身深池兵亦隨斃其子子母俱死

楊氏福山保之女適石勒庠生馮肇先于歸三載值清兵至避難于南石砦砦未破之時預訣姑嫂將所佩釵環分給諸人以銀鐲付嬸令交肇先曰余爲君子全節願善眎遺物以當永訣言畢翻身投崖而死鄒氏在城北隅人交溪保謝經靜之妻順治丁亥歲被郭天才兵執之不從倏于林間裂襟自縊有子二人一應彥爲兵捉去一應傑娶交溪保楊氏歸傑後數旬之內姑死節叔被擄翁以憤鬱歿傑又以病終氏揣無依勢將改字遂盡質所貯以治喪喪畢自經而死

邵武府續志

人物

卷八

五十四

丁氏信義保女嫁龍湖保童光美有殊色丁亥歲年十七爲魯兵所執逼令從已罵不絕口兵復令卒以威劫之氏終不改再以好言誘勸怒罵益力至縛之馬前百般恐嚇竟不移操殺之

李氏在城女幼知書十四歲適交黃坑庠生謝九陞



順治戊子年郭兵焚掠各鄉將至其地舉村逃竄氏亦隨叔九進同走僅半里許兵勢急叔意負之而去氏正色以爲不可曰叔但速行毋以我故累汝倏忽回顧氏已溺于溪池矣

何氏將樂崇善人饒丰姿十九歲嫁梅林聶齊不厭夫貧友好無間已三載夫爲虎所噬氏亟募隣人追之拾得全屍即以所服白衫揩拭血痕殯畢出所有供其塋事事畢又將所餘者分酬諸人乃服其血衫爲和衣有戒以不祥者氏不答入內寢自經殉之

邵武府續志 人物

卷八

五十五

饒氏王憑雲之妻年廿三而寡家素寒薄遺二幼子與菴年姑在堂氏誓不二庭其外家梅瀧去城甚遠給氏歸寧委媒以奪其志氏潛携二子逃歸侍姑奉養者廿餘載且含茶機織爲二孤完嫻歲時伏臘以過哀喪明于順治四年壽八十三

江氏大田楊之妻甲申春天災流行夫之兄弟三人妯娌二人先已分爨而殞氏遺四孤伯遺三孤



叔遺一孤皆三五歲至八九歲而已孤則呱呱氏獨  
乳粥族里危之氏咬指瀝血收撫羣孤饑寒疴痺一  
以誠求氏忘其非己子猶子亦不識其非己母鼎革  
後兵寇交馳無寧居者數年母挾與俱皆獲安全氏  
囑長子一登俾完婚方析爨康熙六年壽屆正寢諸  
猶子輩終喪三年雷開先詩曰托孤臣大節弱婦攬  
呱羣三幹仃伶際千年松栢身燈寒餘廿載泪積見  
先人貞義終無死月魂滅鬼憐

江氏恩貢生李自樹之妻氏青春守制垂老孀居已  
四十年順治十三年按院朱旌獎曰操同金石令尹  
王旌獎曰玉潔金貞郡守劉題守墳處曰霜松  
羅氏江寬妻也年十八而寬歿家貧無子富人謀娶  
誘以歸寧登薦氏覺之乃斷髮誓曰吾頭可斷吾志  
不可奪也足不踰閩懸夫像于室每食必祭孀居五  
十餘載未嘗啓口一笑後上聞表宅

李氏庠生馮朝明妻也年十六歸門兩月而寡起卧



隨姑刻步不離避亂登崖不用男子手引曰死即死矣安可違禮而苟活耶事姑以孝立嗣以慈年七十卒有司上聞表宅

江氏梁述妻也述早卒遺子煥年數歲氏持孤守志貧苦自其時同堂姪梁舉居其左隣每數十日有書記召至中堂秉筆氏于內報數以聲傳未嘗以面交雖至親不輕接一談其凜凜精白居孀五十餘年如一日壽七十三而終今子嗣式微莫為傳表

出梁氏族譜

蕭氏梁萬里妻也初為夫棄無怨言乃格其心未幾里卒遺腹三月同堂危撼日生百方自全彌月生子山氏益含忍保護始得成童教以詩書年方舞象遊庠氏惟苦績自日食外銖累有餘付叔萬奇置業家道方隆不幸奇殞門無長者山亦不檢身亡氏携子歸守志倦倦以宗祊為重撫有孤孫視若己出數十年中顛危備歷今苦節六十有二而終出梁氏族譜



明唐氏灣坊徐麟瑞妻名丹桂廣昌唐坊人年十七夫死自經而殉其父母奔弔見其衣帶中有手書數字云婦道已盡無忝所生邑人多作詩弔之

官氏名異香在城人官祥之女也失其夫名姓其姑嫉惡少闖入其室欲并污之婦恐難免遂雉經死

清李氏王家政之妻楊氏王家祚之妾皆莆田人家於建邑者三世矣二氏皆寡居同處一樓樓跨城臨溪順治戊子城破李謂楊曰勢如此吾兩人豈可見賊而後死乎遂各結束從樓上投淵而死

李氏謝顯之妻城北李春田之女也戊子城破自經而死

張氏縣丞徐時賡之妻浙江龍游人也隨夫宦於建邑戊子城破投井死

以上四人署縣事府同知洪秉銓申詳按院霍公達入祀風教祠

李氏諱長娘武調保楊源葉際劉國平之妻也年二



十喪夫育子事姑曲盡慈孝順治辛卯爲賊所掠欲  
汚之氏給賊曰屬目之地謂羞耻何歸營而從汝未  
晚也賊喜釋其縛而偕行行至楚上三嶺過石橋投  
崖而死時年蓋二十六云貢生徐中極避地楊源知  
其事白於司諭張公賜扁以表其廬

艾氏瀾溪澣口魯璉妻也順治庚寅兵至南鄉艾與  
其姑蕭氏俱被擄婦謂兵爾釋我姑我願隨爾兵從  
之携氏而行至陳坪投身深潭屍流至合水口其夫

邵武府續志 人物 卷八

五十九

收之  
陳氏生員徐必發之妻也食貧佐夫篝燈績學紡授  
子書母道無忝戊子城破賊入其室陳叱賊不屈投  
井而死幼子懋祉擗踊痛絕亦奮身溺井同死嗟嗟  
母以節捐軀子以孝從井一室之中節孝並敦可謂  
難矣通學生員廖賓賢等舉報縣府蒙府轉申按臺  
霍公獎賞給扁以爲風教之勸

葉氏福清縣人明太師謚文忠臺山公次孫益苞之



女而庠生張祈之配也祈父可仰以乙榜掌教建邑  
祈遂補建庠生夫婦俱孝謹好合僅年餘祈力學得  
病氏剖臂和湯以進臂潰弗治歿矢死相從作書別  
母檢服飾以分遺諸親登堂拜翁以相訣情詞婉摯  
慮患深執義確自是遂絕粒忽一日謂人曰吾母遣  
僕魏三來視我旦日而魏三果至氏讀母書畢即火  
之曰吾明日長逝矣絕粒已一月始歿蓋康熙壬寅  
七月也彼其待僕之來而後卒顯示全歸遲速由已

邵武府續志

人物

卷八

六十

且殯殮之際玉貌如生衆共往觀競作詩文以表異  
之女士芳規此其最著矣

邑上徐中恒有全傳在藝文志中

高氏黃淵之妻新城保人鄰居失火將及其廬翁柩  
在堂氏撫棺慟哭而火自止年二十三而寡男梗纔  
三歲或欲奪其志誓死不從艱苦撫孤事姑盡孝郡  
守旌之

何氏謝國徵之妻銃村保人年十九夫故無嗣撫繼  
子世傳成立孝事孀姑雖廁穢必隨院首旌其門曰



節孝

余氏黃燭妻十七而寡遺孤孺生纔四十日守節事姑以孝聞巡撫龐公旌曰坤維正氣

揚氏李奇雍之妻周坪保土磔人年十六雍病氏欲強詣父母不許楊曰安有所天病而不侍刀匕者乎歸期而雍卒楊猶未成婦也父母兄弟欲奪其志楊以死自誓有老嫗以微言挑之楊闔扉哭曰吾欲守貞而不諒者乃撓我不休豈以我爲憚一死耶遂自

邵武府續志 人物

卷八

六十一

經娣姒驚救之自是無敢以他言進者然居恒未嘗戚戚伯氏奇璧教其女問曰媻何以不愁楊曰守節婦人職也若見爲苦難惡能守耶奇璧大奇之誠其婦曰守貞固其天性然家人內外要當有以成之夫所謂非苦難者在彼言則然顧其所爲極難耳其婦亦能體璧意與相得甚歡久之乃得璧次子宏爲雍後揚親課宏讀補邑庠生宏復早卒楊砥勵宏妻黃氏撫二子黃亦能灑操孝養邑令邵守前後並旌之



孔氏廷娘開山保丁貴鼎妻二十八夫亡矢志孀居  
孝事舅姑撫子士濂士濬怡怡有恭歷五世同居享  
年九十七冰霜凜凜如一口縣府道院嘉其節擬首  
題請特旌曰節孝之門

朱氏李寅之妻寅早歿其兄與嫂又相繼歿俱無嗣  
越三年寅弟富又歿僅一子傑纔襁褓朱父母謂氏  
曰而家凶禍如此玆玆僅一孤誰與爲後而苦守爲  
乎氏泣曰兒雖無與爲後然與嬸共一侄猶兒後也

邵武府續志 人物

卷八

六十二

且兒何忍舍姪因抱慄大慟未幾嬸又卒氏撫姪極  
有恩嫠居四十年閨門肅如也郡守采輿論旌之  
何氏王寵之妻大南保人寵年十五而病氏歸侍湯  
藥三月而寵亡氏年纔十四耳猶未成婦也父母迎  
其歸寧謀欲改適氏哭仆地以簪刺其喉示必死父  
母知不可強乃送歸自是遂絕跡母家矣夫兄名冬  
爲臬掾携家福城念氏少不便偕行勸令改節氏曰  
伯以吾累若慕羨乎第日給米一升他無所累伯也



久之以伯子繼子又不率或又諷之氏矢志如初賢  
司訓譚公如桂拜其廬捐俸周之贖令左公欲聞于  
朝已取結於庠矣值內召不果年六十五而終庠彥  
李鳳翔董邦言助貲以塋

廖氏在城人范應寬妻年廿二而寡無子邑諸大姓  
爭委禽焉或勸其改適氏泣曰命如斯矣誓爲范氏  
守此未亡身也自是閉戶誦經足不踰閫者五十餘  
年順治己亥氏年七十有三邑令溫光涵廉得其事

申于直指李公以節勵雲根額褒之

曾氏詹國宗之妻年十九而寡無子後姑又凌虐之  
矢志不移越十餘年始得國定之子雋以承祧年七  
十五而終

王氏廖大器妻名淑通判王用贖之女也器歿遺腹  
生一女無可繼者舅姑逼之嫁氏以死自誓攻苦百  
端久之姒余氏舉子氏撫以爲嗣出其嫁時裝買山  
壙器虛其右以待已徙余姒祔已右臨終如母黨以



相訣於死生之際若有條然者

邑士謝汝聘為之

徐氏黃燧妻年十九而寡以從子都承嗣貞靜婉懿孀居五十餘年而卒其丹從姪水部弼年稱其節艾氏丁兆祥妻事姑至孝體姑之意奪已女之乳而乳幼叔早寡無子以夫弟之子妍彩為其後撫彩極有恩家產一聽二叔處分毫無所問婉懿之德族黨稱之

周氏庠生熊大捷副室也年二十二而夫死遺孤國

邵武府續志

人物

卷八

六十四

泰生僅兩月家值中落氏茹苦撫孤形影相弔孤稍長悉氏紡績佐讀姑程氏老而且瞽氏服勞盡養行坐不離左右迄今氏年六十泰已為諸生邑里嘆為苦節庠生袁奩等僉名呈縣轉申于直指李公蒙給扁旌之

湯氏桂娘在城余萬祚妻年十八未育而寡祚臨終永訣氏泣誓為夫守節里中聞其淑貌託族親勸其改適氏閉戶不見遂斷葷酒撫繼子無異所生孀居



三十五載始終無玷惜以鄉居未蒙旌扁  
黃氏謝朝銘之妻年二十五而寡遺孤僅五歲食貧  
守節撫此孳孳常乏薪不能晨炊同居者遺以束薪  
氏不受曰非吾錢所市非吾子所採不以炊除夕囊  
無一文其子未歸隣人饋以酒肉薪米力却之其介  
然不苟如此比子長能自立氏享年八十三族里稱  
之

范永選妻甯氏者克脩婦職孝姑敬夫年屆三十幸

都武府續志

人物

卷八

六十五

舉一子名有用乳育僅兩月而夫棄世甯號天痛絕  
將欲身殉念此孤嬰爲亡夫所藉不忍擲當時選雖  
賈久家亦中落甯茹荼撫孤逮有用稍長甯仍令習  
賈以資母子之生崇禎十七年甯壽六十通庠生員  
廖元愷等憫其苦節上其狀於邑侯方公大普申道  
府賜節著栢舟扁額旌其廬甯年踰七十卒有用有  
子嘉猷名籍校序

遷寓



泰寧縣

黃端伯字元公江西新城人官至禮部主事現宰官  
身游戲三昧至泰見雷開先深相許可題于齋曰秋  
香蒨院題于家曰求忠門乙酉年死節

池顯方字直夫泉州孝廉為李維禎蔡復一譚元春  
諸先生之友慕邑山水而游所留詩記見晃岩集  
傳冠號寄菴江西進賢人官至閣部丙戌春避地于  
泰之汾水為清兵所緝令其剃髮不屈執至汀州死

邵武府續志 人物

卷八

六十六

節李世熊有傳並汀郡哀章行世

畫網巾先生名位鄉里皆不可稽其初同二僕潛于  
邵光之山寺中衣冠網巾如舊庚寅夏為防將吳鎮  
迹得之俘至邵之副將池池偉而禮之戒部卒曰謹  
事之去而網巾可矣先生謂二僕為我畫網巾于額  
上曰此大明制也即死不可忘人羣噪而觀曰畫網  
巾也是秋左路總督王以勦寇駐泰先生謂池曰我  
識總督王曷不以我請彼乎池從之王見而愕然寔



不識也先生曰既不識請見殺王允反覆勸諭令其  
薙髮全生先生曰痴物網巾尚不忍去况髮乎死矣  
無多談二僕先向主叩頭辭而就刃先生從容檢袖  
中詩一卷擲于地遂挺然受刃于邑水南之荒園中  
庠生謝韓收其主僕之遺骸卜地瘞焉寧化李世熊  
聞而詐傳里人丘嘉彩亦有傳浙江紹興游客林景  
蔚演畫網巾劇○陶靖節以史失齊二客魯兩生之  
名為恨今畫網巾先生之死于秦也人皆以無姓名  
為先生奇夫先生固不屑夫有姓名者也然先生之  
姓名亦何可不傳也時有河南懷慶之俠游馬耀圖  
者隱於營中密告雷易曰先生姓馮名生舜云并志  
之俾後之闡幽者可以無靖節之恨也

附傳 外傳

